

洪北江詩文集

五



予幼時讀荀卿子修身篇曰其爲人也多暇日者其出入不遠矣予嘗執此以觀當世聰明才力之士其有所成者皆勤而不暇者也洪君稚存幼孤得母夫人訓自力於學年未二十以貧客四方迄今又二十年傭書食力之外卽鍵戶誦述研精覃思過其外者如無人焉于經深春秋所著有春秋三傳古義左傳詁二書於史精地理所著有三國東晉十六國疆域三志刊史記以下四史謬誤十二卷又以宋李繼遷傳國逾百年而事蹟闕略復成西夏國志十六卷于六書通諧聲所著有漢魏音四卷外爲詩至二千首文及雜著數百篇而所修府州縣志及爲幕府牋奏不與焉洪君吾不能諒其所至庶幾可爲無暇日者矣君

善於漢魏六朝之文每一篇出世爭傳之以倦於鈔寫茲
友人爲刊其乙集四卷以予素嗜其文因請序于予予前
嘗欲錄亡友邵編修荀慈胡徵君稚威暨君數人之作合
爲一集忽忽未暇也今玉芝堂集及君此刻並已刊成老
念藉以稍慰至其文之淵雅氣質之深厚世皆能知之予
不贅述云

乾隆五十一年歲在丙午花朝日錢塘袁枚序

卷施閣文乙集卷一

陽湖洪亮吉著

連珠三十二首

蓋聞十日並出不若陽鳥之再中百川疾流不若靈河之東注是以日中見斗燭物之理自存山下出泉朝宗之心已著

蓋聞以近槩遠中無豪釐舉後定前失者什伍是以宋國五石忽憶前身爲星泰山一雲安知異日作雨

蓋聞片壤之安羌蝦逞其智一葉之庇螻蟻仰其陰是以吞巨舟者必思江海爲家戴尺木者乃以風雲爲蔭

蓋聞威劫于外則不非其非智昏于中則非類亦類是以

指鹿作馬者刑餘之臣以驚當鳧者刀筆之吏

蓋聞造物之儲或留而不用聖王之制每過于所防是以
一世之衆飲不竭河而供之以江海萬夫之勇超不越丈
而限之以城隍

蓋聞塵揚席上灰然鼎間飛揚雖同涼燠以異是以灌夫
罵坐難止膝席之賓次公酒狂羣驚仰屋之歎

蓋聞力竭智窮則愚者必收拙効識大見遠則感者不嫌
過計是以塵當揚海故冤禽之志不衰杵可倚天則杞國
之憂匪細

蓋聞勢盛復持以奢必無以處時過日午又益以火必無
以禦夜寒是以朱門矜土木之工不能以片瓦覆末世祖

宗饌飲食之譜不能以一飽貽子孫

蓋聞岐塗萬千不當殉之以跬步今古億態不當處之以思議是以立志可以入世故萬物漂動而金石不流無心可以貞運故七曜改色而風雲不壞

蓋聞器適于用貴賤之形泯材值其候小大之勢易是以二曜不可鑑影慙于半規之銅五嶽不可厲刃遜于一尺之錯

蓋聞分有可與則谿壑難盈物非所勝則庸愚念息是以鷹隼卽鷺不求虎豹之腥漁人雖貪非與蛟龍之獲

蓋聞獨心雖智謀事不臧隻拳雖勇遇敵必僨是以明堂九仞承之以百柱則安迅流千里障之以一簣必決

蓋聞邪正殊者必無合志之言得失明者不爲無益之事
是以爲盜之室寧致禱于黔婁習佞之夫不交魂于汲直
蓋聞巧匠制物成毀難定明鑑過影曲直未分是以漢壁
千鎰不能止亞父之碎秦鏡百具無由燭趙高之佞

蓋聞善之與惡氣必相感利之與害勢有各驚是以栽棘
成林鴟鶚樂其安宅平衢似砥狐鼠以爲畏塗

蓋聞思匿其短者以猜疾爲肺腑與遂其私者求黨類爲
膠漆是以無鹽入室視明燭而必讐癭者過市見曲瓢而
自慰

蓋聞五簋登筵旨者早盡千葩攢樹豔者先摘是以終童
夙慧不臻厭次之年龔生竟夭乃致彭城之涕

蓋聞誓苦而不信者五嫁之妻力勤而不錄者屢逃之僕
是以泰室之行非藉于指天晉文之臣不煩于投玉

蓋聞非神無以燭事而或有所窮非勢無以馭物而或有
所遏是以珠玉沒水日月不能垂其照魑魅遁虛雷霆不
能施其烈

蓋聞節有至奇視其所發行有甚烈必貴得宜是以證羊
之直用于子而不慙嚴父枹柱之信移于女而必爲貞姬
蓋聞乾煦坤和矜垂于微末日變月蝕光起于纖豪是以
一婦至冤東海有赤田之旱匹士銜憤吳門成白馬之濤
蓋聞能有所盡智有所窮安之者聖強之者愚是以六合
之外不知仲尼故聖于鄒衍五經之表不議孟子亦賢于

莊周

蓋聞淒思一入則萬態助悲華心旣揚則百族盡煦是以朱戶累累明月至而益輝蓬闥蕭蕭寒風來而若怒

蓋聞飛霰于夏時苦救而天灾成舉耒于朝民勞同而主事廢是以馭一世者以不勞成勞調四氣者以不德爲德蓋聞秉萬族之秀則物遜乎人成一節之奇則人希乎物是以充廉士之節必爲蚓而爲魚言君子之化或成援而成鶴

蓋聞能有獨擅理不得均器有偏饒勢無能共是以田竇之家以千金而易一賦枚馬之室用萬言而貸半鐘

蓋聞美醜雜陳要于取法剛柔性定貴擇所從是以下士

心競視流水而可平懦夫氣衰見高峯而亦竦

蓋聞嚴霜被澤嘉草同萎野火燎原仁獸亦燼是以君子
業業不垂禍福之言小人皇皇乃著灾祥之論

蓋聞理無所宜必求實效用各有適無貴虛名是以琴瑟
雖雅非能引之論心鸞雀甚馴不可委之守藏

蓋聞炫寶于門伺者百盜露竒于世忌者萬夫是以尺璧
在抱必加再襲之衣積金之家恆著重扃之戶

蓋聞拔木之獸天不能不生而有山以相域惑川之蟲地
不能不載而有墟以相容是以魚假之足則江海之塗必
塞虎傳之翼則城郭之民已空

蓋聞貴不若賤以計得失智不若愚以識趨辟是以萬衆

局縮蹈白刃者烈夫一世震懾犯龍鱗者匹士

淳化縣志敘錄十八首

予自歲辛丑入關撰定此間方志者三同州之澄城邠州之淳化長武是也關中地大物博又諸紀錄自漢三輔黃圖以降暨唐韋述關中記宋宋敏求長安志程大昌雍勝畧等咸可準繩而府州縣志可采者蓋寡蓋明代諸賢事非師古苟爲簡略卽故城舊瀆皆棄之如遺今所盛傳武功朝邑二志不知者以爲實過古人非篤論也予爲此志一準昔賢非苟求立異實欲藉茲成規示諸來禩凡爲記八爲簿二爲志五爲略三共三十卷凡五閱月而成其敘

曰

古縣今縣新城故城黎園舊鎮流金昔鄉咸攬川陸附之
橋梁倣晉朱育會稽土地記等述土地第一

史言甘泉傳志石門冶谷引涇荆山導汧灌溉之利被于
無邊倣齊劉澄宋初山川古今記等述山川第二

史家遺法首記大事三千餘年如掌可指倣漢司馬遷等
大事記述大事第三

古云吉行日三十里披諸圖經式其遺意倣隋西域道理
記等述道理第四

嬴秦築宮遷五萬家越漢始元徙民三輔良規旣失志丁
畧戶稽其盈虛逮今淳化倣宋元康六年戶口簿記等述
戶口第五

惟民之俗百里不同爰志士女逮農工商倣晉周處風土記等述風土第六

雍州積高神明之區雲陽甘泉又帝所居下暨小鬼靈而不誣倣齊祠廟記等述祠廟第七

世遠莫追金天有陵青鳥之冢圖書可徵仿宋李彤聖賢冢墓記等述冢墓第八

秦皇漢武築宮祈仙洪崖弩陆增城在焉百世飄忽羊牛下來下士奏賦通天之臺倣晉洛陽宮殿簿等述宮殿第九

征輸之薄前代所無農桑絲粟以迄市租冊籍可稽職于胥徒倣宋李常元祐會計錄等述會計第十

泮宮居前叢祠列後英英羣賢光我俎豆倣宋崇寧學校
新法志等述學校第十一

才餘于官不廢嘯歌此如傳舍所閱旣多倣宋無名氏衙
署志等述衙署第十二

白公鄭國民歌至今王陽作令亦有遺音采其遺蹟以代
吏箴倣唐杜佑通典職官志等述職官第十三

世需多士士貴通經茂才異等咸貢王庭倣宋崔氏登科
記等述登科第十四

廣陵列士會稽先賢列女後傳撰于顏原邑縱蕞爾無微
不傳倣晉常璩華陽國士女志等述士女第十五

金石之文古稱不朽彙茲豐碑庶傳于後倣宋鄭樵通志

金石畧等述金石第十六

淵雲之作冠于簡端國師峨峨亦賦甘泉後有多士庶幾前賢倣漢劉向七畧詞賦畧等述詞賦第十七

凡志方隅必推今昔稽乎古圖準以今尺惟茲一編咸述舊聞勿淆其次以俟後人倣常璩華陽國志序錄等述序錄第十八

終南山圭峰寺銘

若夫一峰之上支公疏其小池百尺之餘祇園森其列柏高瞻遊鱗顰矚飛鳥南則層峰接天意凌星斗北則青氣屬地靡見寰宇陰厓草枯積雪尙白煦谷氣暖巖花已紅怖鴿一隊枯僧兩三翳綠蘿而居穿白雲而出相與並肩

層巖凝睇初日金碧萬端華心易其素念霞采億狀茅齋
成夫麗矚蓋已響沈音外思舉雲表者焉適有奇石陵乎
坐次爰爲之銘曰

空水易曙白雲知春十步五步花香送人蘿谷尙暗松軒
已辰僧疑入定崔仁棲真鐘疎出寺鐙暗披帷琴牀月落
蝶帳風開草名躑躅花號徘徊虬枝競挽馬首頻回塔看
倚杵峰真秉圭

終南山高觀谷銘

鄠縣東南行三十里有高觀潭谷水出焉五里未及驚霆
接天百步尙懸飛瀑搏潁洵人外之奇觀霞表之靈境也
若其危厓半傾若斜景之入海巨石自轉同高穹之隕星

曾不踰時已抵絕壑雖激電之閃戶飛矢之出林不是過也春雨旣積山空自鳴萬壑競乎一門百丈限之盈尺此則山澤氣阻陰陽與之回皇風雲色變星辰因而匿采者矣余尋幽匪遙好奇斯過遵彼磐石薄焉觀之齋心旣空盈耳有悟遂爲之銘曰

鯨波仞湧龍氣猶腥高欲切漢光疑浴星頰峰作檻劈石成扁出竇始白回瀾乃清流金迄石衝谷注壤海若輸靈坻隤遜響遵巖覓電頰壑尋雷天地黯慘風雲蔽虧無人獨往有月飛來

漢麒麟閣功臣頌

并序

麒麟閣者漢宮閣疏名云蕭何造張晏曰武帝獲麒麟時